

Tiwei Pol Kewisik Ken Wit Filipai

Menmen me tiwei ik

Pol katip hirak kitehi God ke mit me wit Filipai 1:1-11

Menmen epei man mewaank Pol 1:12-26

Menmen mit nanisesim nentar hir ne Krai 1:27-2:18

Pol kewepyapir menmen Timoti ketike Epafrodaitas tiriakem 2:19-30

Pol katip mit hir naanmipre hiras me mit enun netike menmen enun
3:1-4:9

Him me Pol ketike nirak yinan neit wit Filipai 4:10-20

Pol katip mit ne Filipai him mikaru 4:21-23

Tiwei Pol kewisik ken mit ne Filipai

1 ¹Hi Pol hetike Timoti hawir wiriak menmen iuwe me Jisas Krai kerekek. Hawir wesiuwe tiwei ik ken yi mit kerek yinin naanmipre mit miyapir ne weiwik me God yetike yi mit yekepi yeit wit Filipai, yi yetike mit yapirwe ein kerek yi yises him me Krai Jisas. ²Hawir hanhan God Haai kaiu ketike Nikan kirak Mitik Iuwe Jisas Krai hirakit tatrekyi yaaim, yi eiyu werek werek.

Pol kitehi God kakikaap mit yapirwe nankine tiwei ik

³Hi hatip God hirak yaaik kentar hi han kitet hirak kerekyi yi yaain te yi mit epei yiriak menmen yaaim. ⁴Wi ham hi hitehi God menmen hi han yaaik hitiwekhi me yi mit yapirwe ⁵hentar yi yekepa haiu matip mit miyapir him me God, nipaa yi yinin yemtewem ere in. ⁶Hi hertei menmen im werek werek. God kerekek nipaa kerekyi yi yisesik hirak kakikepi yi yeipisesik werek werek ere maain wi Jisas Krai pike kaknen kakwepyapir hirekes. ⁷Hi hanhan yi mit yekre han kai. Im yaaim mentar God epei kiriak yaaim kikaap haiu mit nipaa wi hi hepu hekre winak

^a 1:1 Ap 16:12-40 ^b 1:2 Ro 1:7; Ga 1:3; Fl 3 ^c 1:3 Ro 1:8; 1Ko 1:4 ^d 1:6 1Ko 1:8; Fl 2:13

enuk ke gavman o wi hi hepu witeik, hi hewepyapir him me God hi hari han ke mit te hir nisesik heriuwe menmen hi hiriakem. ⁸God hirak kertei hi hanhan iuwe me yi mit yapirwe har ke Jisas Kraiss hanhan yi mit.

⁹Hi hitehi God te yi mit han teweninan wisenum, yi eiyrtei menmen me God werek werek, yi eiyrtei mekam yaaim mekam au enum, ¹⁰te yi eiyses menmen yaaim iuwe te menmen enum ap mamu mamikre han ki au me wi Kraiss pike kaknen. ¹¹Te in ek Jisas Kraiss kakrekyi han ki yaaik kau him keriuwe menmen yaaim, yi eiriak menmen yaaim te God kakit niuk iuwe kakinterim.

**Pol kepu winak enuk, menmen im mikaap
him me God mamno heriyai heriyai**

¹²^hNai yinan, hi hanhan te yi eiyrtei menmen im epei man merewaank hiram man mewaank him me God au. ¹³ⁱHiram men mikaap mit ne ami ne gavman netike mit nau menep menep hir nertei hi hepu hekre winak enuk ke gavman ik e hentar hi hises him me Kraiss. ¹⁴Nai yinan in yapirwe hir ap ninaain te hir natip mit him me God wisenum nentar hir nira hi hepu winak enuk ke gavman ik ek. Hir han kitet Mitik luwe Kraiss kakikepi.

¹⁵Mit han natip mit miyapir him me Kraiss nentar hir hanhan nanri mit nanises him mir te hir nanwenipi niuk mir. Mit han newepyapir him me Kraiss nentar hir yaain hir hanhan niriakem nankepa. ¹⁶Mit han yaain hir niriakem nentar hir hanhan neriuwa. Hir nertei God kehimitena hi naanmipre him mirak hewepyapirem heit in. ¹⁷Mit han newepyapir him me Kraiss nentar hir hanhan neriuwa au. Hir han kitet hir nenipau hi yink enuk han enuk hentar hi hepu winak enuk ik ek hir nari mit yapirwe hir nanisesi, te hi au. ¹⁸Hiram emirem! Hi han yaaik heriuwerem hentar mit hir newepyapir him me Kraiss me han kir yaaik o han kir enuk. Hi han yaaik ehu entar hi hertei.

Hi hepu ti ik, hi hewenipi niuk me Kraiss

¹⁹^jGod himin yaaik kerek Kraiss epei keriuwetek kan kakikepa kakwisa hi eno witeik entar yi yitehi God kakikepa.

²⁰^kHi han kitet hi ap epakin him me God te hi yink enuk eriuwe hirekes hentarim te hi han tokik ehu hi hatip mit him mirak har ke nipaa ein ere in hi hewepyapirem. Hi ehu o maain mit ne ami naniyep hi hahi, hi hanhan mit nantip Kraiss hirak yaaik nanintar menmen hi hiriakem.

²¹^lHi ehu te hi ehises Kraiss. Hi au hahi te hi ehit menmen yaaim im e: Hi

^e 1:8 Ro 1:9; 2Ko 1:23 ^f 1:10 Hi 5:14; Fl 2:16; 1Te 5:23 ^g 1:11 Jo 15:8 ^h 1:12 2Ti 2:9
ⁱ 1:13 Ap 28:30; Ef 3:1 ^j 1:19 2Ko 1:11 ^k 1:20 1Pi 4:16 ^l 1:21 Ga 2:20

ehu etikerek. ²² Hi hahi o ehu, te maain menmen hi hiriakem mamkaap mit nanises Krai. Hi hepitari mekam minin. Hi hahi o hi ehu. ²³ Hi han kai kekrit kekrit. Hi hanhan te hi hahi te hi ehu etike Krai. Hiram yaaim iuwe. ²⁴⁻²⁵ Au, hi ami ehu te hi ekepi. Hiram minin. Hi han kitet hi hahi au ehu te hi ekepi yi eiyises him me God werewek werewek yi han yaaik eiyu eiyintar hi wen hepu. ²⁶ Maain hi enen ehu etikewi yi han yaaik yeriuwa wisenum te yi eiwenipi niuk me Krai.

Mit ne Filipai netike Pol hir nekiyan nanises him me Krai

²⁷ Mekam mamnen yi han kitet menmen im. Yi eiriak menmen yaaim mar ke mit hir nises him me God te maain hi ari o au, hi tewen ehimtau him yaaim mit nanitpim me yi mit, yi eikiyan eiyu han kiutip. ²⁸ Yi ap einaain eiriuwe mit enun nerekyi enum au emit! Yi eiyirp eitip mit him yaaim me God keremem, te menmen im meteiknor maain God hirak kakiwaanki, te meteikni yi au maain God kaktihis yi eiyu werewek. ²⁹ God kewisi yi yises him me Krai weinim keremem au. God kewis mit enun hir nerekyi enum nentar yi yisesik. ³⁰ Yi yetikewa haiu mekiyan mit hir nanwep nanraiwaank nar ke nipaa ere in yi yertei hir neiyep nerewaank.

Haiu mewenin han kaiu han ekitet mit hir nises him me God

2 ¹ Yi han ki kepu tokik kentar yi yises him me Krai. Yi han yaaik yepu yentar Krai hirak han tewenini. Yi yetike God Himin Yaaik yi yau han kiutip, yi han ekitet mit yi han etwenini. ² Menmen im epei mau han ki te yi einipa te hi han yaaik iuwe. Yi eikiyan eiyu han ekitet menmen miutip, yi han tewenin mit netike God. Yi eiyu han kiutip kerekek. ³ Yi ap han ekitetan me yi hiras keriyen au. Yi han ekitet mit han menmen hir han kitetim. ⁴ Yi ap eiriak menmen te mit nantip nanwenipi yi iuwe au emit! Yi eiwenin han ki yi han ekitet mit hir ninini hir yaain.

Krai kinaaiwir menmen mirak yaaim kekepai te God kewenipiyek hirak iuwe

⁵ Yi han ekitet menmen yar ke Krai nipaa hirak han kitetim. Hiram im: ⁶ Hirak kertei hirak kipre God te hirak ap hanhan kaku kakir ke hirak. Au, ⁷ hirak keweikin sip kewetiwem hirak hirekes keweikinhis kire mitik weinik Maria winaak, hirak kepir ke haiu mit. ⁸ Hirak keweikinhis kar ke mitik weinik, hirak kewenin han kirak kises him me God. God

^m 1:22 Ro 1:13 ⁿ 1:23 2Ko 5:8 ^o 1:27 Ef 4:1; 1Te 2:12; Fl 4:3 ^p 1:30 Ap 16:19-40; Fl 1:13 ^q 2:3 Ga 5:26; Ro 12:10 ^r 2:4 1Ko 10:24, 33 ^s 2:6 Jo 1:1-2, 17:5 ^t 2:7 2Ko 8:9; Jo 1:14; Ro 8:3 ^u 2:8 Jo 10:17; Hi 5:8, 12:2

katip hirak eki ekikaap haiu mit, te hirak kises him mirak hirak yink kekek hirak kaa kentar nu tentarakit. ⁹ Hirak kaa kentar nu tentarakit kire mitik enuk, te God katip hirak enuk au. Hirak kewenipiyek katip hirak yaaik wisenuk. ¹⁰ Hirak Mitik Iuwe kinin menmen yapirwe. Hirak yaaik wisenuk te neimin neit wit ke God o nepu ti in o mit epei naa niwaa ti o tipir, hir nanimtau God kekine niuk me Jisas, hir yapirwe nanineinik nanwen ninip nantip nanir ik: ¹¹ ^x“Hirak Yaaik au Iuwe,” hir nanwenip God Haai hirak iuwe kakintar menmen im me Krais.

**Haiu mamre si mamteikin mit yayiwe ke witaan,
haiu emteiknor yayiwe ke God**

¹² Nai yinan nipaa hi hepu hetikewi yi yemtau him mai yi yisesim. In ek hi hepu hetikewi au hi heit yanimin. Yi eiyisisa eiyir ke nipaa ein yi yisisa te in ek yi eiyises him mai wisenum. Yi eiyises menmen nipaa God kerekiyiem te maain hirak kaktihis. Yi einaain eipirpir te yi ap einipek yink enuk ekiriwi. ¹³ Yi eiriakem eiyintar God hekrit hekrit kiriak han ki te yi hanhan eiyises menmen hirak hanhan yi eiyisesim.

¹⁴ Menmen yapirwe yi yiriakem yi ap yenehan yenehan yeriwerem au emit! Yi eiriakem keremem. ¹⁵ ^a Yi eiriakem mamir im te yi ap eiriak menmen enum au yi eiyu yaain. Yi yaire nikerek ne God yi yaain yar ke si me witaan mir, yi yau nimir ke mit hir niriak enum enum, ¹⁶ ^b yi eiyitpor him yaaim me God mamkaap mit hir nanu werek. Yi eiriak menmen im te maain Jisas pike kaknen hi han yaaik entar hi hertei menmen hi herekiyiem hiram weinim au.

¹⁷ ^c Yi yises him me God hiram mar ke yi yewepwar yewis menmen mau kinan yewet God em. Maain hir mit naniyep hi hahi hemkre mamwen hiram mire mit neit tipar naam nerpaasem neiyim nenke menmen. Hemkre mai mamwen hiram mamkepi yi eiyises God werek werek, te hi han yaaik wisenuk. ¹⁸ ^d Menmen im mamnen te yi han yaaik eitikewa eiyir ke hi han yaaik.

Pol ketpor ke Timoti

¹⁹ Hi hanhan Mitik Iuwe Jisas kakwisa hi eriuwet Timoti kaknen kakir yi mit te maain Timoti pike kaknen kakitpo hi ertei yi yepu werek yises God, te hi han yaaik eriuwi. ²⁰ Hi ap mitik kei yaaik kipir ke Timoti. Hirak kipra te hirak hanhan kakikaap yi mit eiyu werek werek. Hirak kiutip kerekek. ²¹ ^e Mit han hir enun han kitet hiras. Hir

^v 2:9 Ap 2:33; Ef 1:20-21; Hi 1:3-4 ^w 2:10 Ro 14:11 ^x 2:11 Ro 10:9 ^y 2:12 Sam 2:11; 1Pi 1:17 ^z 2:13 Jo 15:5; 1Ko 12:6, 15:10; 2Ko 3:5; 1Te 2:13 ^a 2:15 Dan 12:3; Mt 5:14, 10:16; Ap 2:40 ^b 2:16 Fl 1:10; 1Te 2:19; Ais 49:4; Ga 2:2 ^c 2:17 Ro 15:16; 2Ti 4:6 ^d 2:18 Fl 3:1, 4:4 ^e 2:21 2Ti 4:10

ninapen naanmipre menmen me Jisas Krais mit nisesim. ²²Te yi yertei Timoti au. Hirak mitik yaaik han kitet hirekes au han kitet yi mit. Hirak kekepa hawir wewepyapir him me God kepir ke nikan kikaap haai kirak. ²³Maain hi ertei mekam mamnen hir nerekyewem te hi hare esiuwe Timoti kaknen yi mit. ²⁴Hi han kitet Mitik Iuwe God kakikepa hi eno witeik waswas te hi hetike Timoti hawir waunen wauri.

Pol katip him me Epafrodaitas

²⁵Hi han kitet hi eriuwet Epafrodaitas kaknen yi mit hirak kai yinak ki yinak, hirak ketikewa hawir wiriak menmen miutip me God war ke mit ne ami niriakem. Nipaa yi yeriuwetek kan kekepa me menmen. ²⁶Hirak hanhan kakir yi mit kentar yi yemtau hirak kinap te hirak kinapen yi hanhanek hirak kinap. ²⁷Nipaa menep hirak kaa te God han teweninek kekepek hirak kaa au kepu. Hirak han teweninek kerekek au. Hirak han tewenina ap kenipek kaa te menmen im ap merewaank han kai, hi wen hau hekre winak enuk. ²⁸Te hi heriuwetek waswas kakno kakri yi mit te yi eiyirek yi han yaaik eiriuwerek. Yi han yaaik eiyu te hi han yaaik eriuwi. ²⁹Hirak kakiun wit yi yayirek yi han yaaik eiriuwe Mitik Iuwe hirak kewisik ap kaa au. Mitik kar mitik ik ek yi han ekitet hirak iuwe eiyintar ³⁰hirak ap hanhan hirak hirekes kaku au. Hirak han kitet menmen me Kraiss, hirak menep kaki, hirak kekrehir ki hirak kekepa wisenum te hirak kinap.

Keimin kises him me Jisas Kraiss hirak mitik yaaik

3 ¹Nai yinan him im mikaru hi hetpiyem. Yi han yaaik eiyu eiriuwe Mitik Iuwe. Menmen nipaa hi hewisiyem, in ek hi hewisiyem heteipim. Hi ap hinapen hewisim heteipim. Hi hewisim mamkepi te yi eiyu werek werek.

²Yi naanmamre hiras me mit ein hir enun nire nepere me yaank, hir nanri han ki te yi eiyises menmen me nipaa ein me Moses. Yi naanmamre hiras me mit in hir natip yi eirekir yink ki. ³Haiu mit in haiu keriyen mire mit God kehimitenai haiu mit nirak mentar haiu mewenipi God meriuwe Himin Yaaik kirak, haiu matip Kraiss Jisas hirak Yaaik haiu misesik. Haiu ap han kitet haiu merekir yink kiau hirak kakikepai haiu mamit himin yaaik haiu mamu mamtike God taau. ⁴Hi hanhan te hi hises menmen me mit hir nerekir yink hi hisesim te hi au hinapen. Mit han hir han kitet hir nerekir yink te menmen im mamkepi hir nanu werek, hi hertei nipaa hi hinini me menmen im. ⁵Nipaa hi hemkretuk hi hepu wi hispinak wikak (8), mit nerekir yink kai. Miye wina hi mitik ke Isrel ke weiwik me maam

^f 2:25 Fl 4:18 ^g 2:29 1Ko 16:16, 18; 1Ti 5:17 ^h 3:1 Fl 4:4 ⁱ 3:2 Sam 22:16, 20; Rev 22:15 ^j 3:3 Ro 2:29 ^k 3:4 2Ko 11:18, 21 ^l 3:5 Lu 1:59; Ro 11:1; 2Ko 11:22; Ap 23:6

kai Bensamin. Hi Hibu hi ke weiwik me Ebrahim kerekek. Hi epei hises him me God werek werek hentar hi hises him me mit ne Farisi. ⁶Hi han kitet hi hiriak menmen iuwe me God te hi hewaank mit miyapir kerek nises him me Krai hir ne weiwik me God. Mit kerek hir ninina natip hi hises him me Moses werek o au, hir natip hi yaaik, menmen enum au. ⁷Nipaa hi han kitet hiram menmen iuwe te in ek hi han kitet hiram menmen weinim te hi hises Jisas Krai hirak kakikepa hahu werek werek. ⁸Hi han kitet menmen im nipaa hi hisesim hiram weinim keremem au. Menmen yapirwe hi han kitetim hiram weinim mentar hi hertei hi hises Krai te menmen mirak minin menmen yapirwe me nipaa mamkaap mit nanu nantike God. Hi epei heweikin sip ewet menmen yapirwe marim hi han kitet hiram mire menmen enum meit teipe wenut eim te hi ehises Krai werek werek. ⁹In ek hi ap hiriak menmen iuwe hises menmen me him me Moses werek werek te God katip hi mitik yaaik au. God katip hi yaaik hentar hi hemtau him me Krai hi mitik ke weiwik mirak. God kewetai menmen yaaim mekre han kaiu kentar haiu mises him me Krai keremem. ¹⁰Hi hanhan menmen im. Hi hanhan hertei Jisas Krai werek werek ketike menmen iuwe mirak nipaa hirak ketiwem wi hirak kinaaiwir herwe hei hirak kekrit kepu. Hi hanhan menmen nipaa menep Krai hiram mamiyep mamkaap han kai kaki ke menmen enum me ti kakir ke wi nipaa hirak kaa kentar nu tentarakit. ¹¹Hi hiriak menmen im te maain, hi hahi, hirak kakikoya hi pike ekrit ehu ekiterek.

Pol hanhan hirak kakre mitik yaaik kakir ke Jisas

¹²Hi ap hatip hi epei hises menmen im me Krai werek werek o hi epei mitik yaaik. Au, hi wen hisesim te hi har ke Krai hentar hirak epei kehimitena hi mitik kirak. ¹³⁻¹⁴Nai yinan hi ap han kitet hi epei yaaik hepír ke hirak. Au, hi hiriak menmen im: Hi heweikin sip ewet menmen me nipaa ein, h hire mitik kesiuknen resis kakit menmen, hi hises menmen me God iuwe te maain hi ehít menmen hirak kehimitan haiu mit em. Hiram menmen im em: God keninau keriuwe menmen Krai Jisas epei kiriakem te hi ano ehu etikerek.

¹⁵Haiu mit haiu mire iuwe me menmen me God haiu mau han kiutip me him hi epei etpiyem. Yi mit han ne yi mit ein yi han kitet menmen ham te God kakteikni hiram enum yi ap eiyisesim au. ¹⁶Yi ap han ekitet menmen im yapirwe emit! Menmen me God nipaa haiu misesim, yi yetikewai haiu wen mamisesim wisenum te haiu mamre yaain mamir ke Krai.

^m 3:6 Ap 8:3 ⁿ 3:7 Mt 13:44, 46 ^o 3:9 Ro 3:21-22 ^p 3:10 Ro 6:3-5, 8:17; Ga 6:17

^q 3:11 Ap 4:2; Rev 20:5-6 ^r 3:12 1Ti 6:12, 19; Ap 9:5-6 ^s 3:14 1Ko 9:24 ^t 3:15 1Ko 2:6

^u 3:16 Ga 6:16

¹⁷vNai yinan yi wen eiyises menmen hi hiriakem. Yi eiyihimitan mit hir nises menmen nipaa yi yir haiu mit in haiu misesim meteikniyem, te yi yises menmen mir. ¹⁸wNipaa wi yapirwe hi hetpi te in ek hi menep hi hikit hi hetpiyem heteipim. Mit han nare nises Krai te hir neriuwe menmen enum hir niriakem neteiknai hir nisesik au, hir nemipin. Hir nire mit enun nepan ne Krai. ¹⁹xMit narik naniwaank hiras hir nanino si takikneni nanintar hir nises han ke yink kir keremem, God au. Hir han yaaik newepyapir menmen enum hir niriakem menip mit hir yink enuk neriuwerem. Hir han kitet menmen me ti keremem. Yi ap eiyises menmen mir au emit! ²⁰yHaiu mit ne ti ik e au, haiu mit ne wit ke God, haiu memerir Mitik Iuwe kiau Jisas Krai hirak kaknaaiwir wit ke God kaknen kaktaihis. ²¹zHirak kaknen kaktaihis, hirak kakikrehir yink kiau maain kaki, hirak kaknipek kakweikinhis kakre yink kirak yaaik iuwe kakriuwe menmen iuwe mirak hiram werek te maminin menmen yapirwe te hirak naanmamprewem.

Yi mit han yaaik eiyu yi han kiutip eiyu han ekitet menmen yaaim

4 ¹aTe nai yinan yi han tokik eiyu eiyintar menmen hi epei hetpiyem. Hi han tewenini hi hanhan pike enen eri, hi han yaaik heriuwi hi ewenipi yi mit. Mit han nanir menmen yi yiriakem, hir natip hiram menmen yaaim hi heteikniyem.

²Yuodia hi hetput him manp. Sintiki hi hetput him manp. Yi miyapir wik yi eikiyan eiyu han kiutip eiyises Mitik Iuwe Krai. ³bHi hituthi ti mitik yaaik kerek nipaa hetikewa wiriak menmen miutip, ti akaap miyapir wik en enu han kiutip nentar hir nekiyan nekepa natip mit miyapir him me God, hir netike Klemen. Mit miyapir han ne yi mit ein yi yetikeri yekepa te God hirak kertei niuk mi mekre han kirak yi nikerek nirak.

⁴cYi han yaaik eiyu eiriuwe Mitik Iuwe Krai. Hi hetpiyem heteipim: Yi han yaaik eiyu.

⁵dYi eiwis mit yapirwe hir enirtei yi mit ap yises han ki ke menmen yapirwe au. Yi yemtau him me mit han yentar Mitik Iuwe Krai kau menep, hirak kau ketikewi. ⁶eYi ap yinaain han kitet menmen yapirwe au emit! Yi han yaaik eiriuwe God yi eiyitiwekhi me menmen yi yinaain han kitetim, ⁷fte God kakikepi kakriuwe menmen mirak haiu ap merteiyem hirak naanmampri kaknipi yi mit yi han yaaik eiyu yi han ekitet menmen werek werek eiyintar menmen Krai epei kiriakem.

v 3:17 1Ko 4:16; 1Te 1:7; 1Pi 5:3 w 3:18 1Ko 1:23; Ga 6:12 x 3:19 Ro 16:18, 8:5-6
 y 3:20 Ef 2:6, 19 z 3:21 Ro 8:29; 1Ko 15:28, 43-53 a 4:1 1Te 2:19-20 b 4:3 Sam 69:28;
 Lu 10:20; Rev 20:12 c 4:4 Fl 3:1 d 4:5 Hi 10:25, 37; Je 5:8-9 e 4:6 Mt 6:25-34; 1Pi 5:7;
 Kl 4:2 f 4:7 Ais 26:3; Jo 14:27; Kl 3:15

⁸Him im mikaru hi ehitiyem. Yi han ekitet yapirwe menmen hiram ap me memipin au hiram yaaim, menmen mit han kitet hiram yaaim. Yi han ekitet menmen hiram menip God ketike mit hir han yaaik, hiram yaaim te hir mit hanhan nanisesim. Mekam hiram yaaim mire menmen im yi han kitetim keremem. ⁹Menmen hi epei hetpiyem yi yira hi hisesim, yi eiysesim te God kerek hirak kaknipi yi han yaaik eiyu, hirak kaku kaktikewi kakikre han ki.

**Pol han yaaik keriuwe mit ne Filipai kentar
hir newetiwek menmen mekepik**

¹⁰Hi han yaaik iuwe heriuwe Mitik Iuwe Kraiss hentar nipaa yi han tewenina yekepa. Nepei ein ere in yi han tewenina te yi ap yekepa au. In ek yi yekepa yeweto menmen. ¹¹Hi ap hetpiyem hentar hi ap hetenen menmen au. Hi epei hertei mekam mamnen hi ap hanhan menmen emit. Hi ehu han yaaik heriuwerem. ¹²Hi hertei hepu har ke mitik ketenen menmen aurek, hi hepu har ke mitik ketenen menmen yapirwe. Hi epei hertei werek te wi mekam o wit mekam hi hau en, hi ninpi meiyu o hi tu iuwe, hi han yaaik ehu. ¹³Hi werek te hi hiriak menmen yapirwe hi epei hetpiyem heriuwe menmen iuwe Kraiss kewetewem kewisim mekre han kai.

¹⁴Yi yerekyo yaaim yi yekepa yeweto menmen yaaim me wi menmen enum epei man mewa. ¹⁵Nipaa me wi hi hinaaiwir provins Masedonia hewepyapir him me God yi mit ne wit Filipai keriyen yi yeweto menmen yi yire mit nirak yinan newetiwek menmen, hirak kewetir menmen. Mit nerer wit wit nekepa au. Yi keriyen. ¹⁶Nipaa hi hepeit wit Tesalonaika yi yekepa yeriuwet menmen yi pike yeriuwetem yeteipim yekepa. ¹⁷Hi ap hanhan menmen me yi mit yeriuwetewem au. Hi hanhan God kakweti menmen yaaim mentar menmen yi yerekyewem. ¹⁸Hi epei heit menmen yapirwe minin menmen hi hanhanem. Epafrodaitas keteninim yi yeriuwetek hirak kan kewetewem. Menmen im yi yewetewem hiram yaaim menip God hirak han yaaik keriuwi. ¹⁹God kerek epei keriuwet Jisas hirak kan kekepai haiu mit, hirak ketenen menmen yapirwe, hirak kakwetai menmen haiu metenenim au hirak naanmamprai te haiu mamu werek werek. ²⁰Hi hanhan God kerek hirak Haai kaiu, mit hir nanwenipi niuk mirak, hirak yaaik tipmain enum eik.

Pol katip him kike mikaru

²¹Hi hetike nai yinan in haiu matip yi naiu yinan en yises Kraiss Jisas niutip niutip haiu metpi yi yaain. ²²Mit yapirwe in nises Kraiss Jisas hir

⁸ 4:8 Ro 12:17 ^h 4:9 Ro 16:20; 1Ko 14:33; 1Te 5:23 ⁱ 4:11 1Ti 6:6 ^j 4:13 2Ko 12:10; 2Ti 4:17 ^k 4:15 2Ko 11:9 ^l 4:18 Fl 2:25; Esi 20:41; Ef 5:2 ^m 4:22 Fl 1:13

netpi yi yaain. Mit han nises Krai kerek niriak menmen me mitik iuwe Sisa, hir netpi him iuwe nar ik: “Yi yaain.” ²³Hi hanhan Mitik Iuwe Jisas Krai kerek kakrekyi yi eikiyan eiyu werek werek, hirak kaku kakikre han ki kaku kakit.

Mepir keremem